

CARTA JEE NI TEE APOSTOL SAN PABLO NUU ÑAYUU ÑUU FILIPOS

1 Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyucú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tée cándiso jníñu cándito róhó, jíin núu tēe cájejníñu mēhñu ró. ²Te cáñuhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo siñ ni rō.

Jeē jicán tahu Pablo jehē ñáyuu cácadíje

³Tāca jínu jeē núcūhun ni rí rohó jíjnáhan ró, te nácuatáhú rí nuū Yaā Dios. ⁴Te náa jicán tahu rí, te níni cúsiñ ni rí jicán tahu rí jehē rō. ⁵Chi ni chindéé ñájnáhan ró jíin rí jeē scáca yó jnúhun váha ya, nde quiví ní cacandíje ró te nde vijna. ⁶Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quiví ndíji Jesucristo, te sínu ndihí ya. ⁷Te íyó váha jeē súcuan jéni ni rí siquī tāca róhó, chi yōhyo maní rí jíin ró, te ínuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiñi ri nuū tāca tēe cújéhnu, cahān rí jehē jnúhun

jeē jnáma ya yohó jéē jnúhun ndaā cúu. ⁸Chi Yaā Dios jíin yā ndese yōhyo maní rí jíin ró jíjnáhan ró, nájnūhun yōhyo maní Jesucristo jíin yó. ⁹Te jicán tahu rí jeē na cáa ga jeē cundáhú ni rō jnáhan ró, jíin jéē na jécūhun ga ni rō te cundíchí ró jíin tāca jnúhun ya. ¹⁰Te súcuan te cuu nacáji ró tāca jéē váha condiquín rō, te caca ndaā rō, te ma cóo ni íin cuéchi siquī rō quiví ndíji Cristo. ¹¹Te súcuan te cayā cuehē jniñu váha jeē sáha Jesucristo jíin ró. Te sáha jeē coo yíñúhún ñáyuu jíin Yaā Dios te cahān i jeē yōhyo luu cújéhnu ya.

Jnúhun jeē técu nduú yó jíin Cristo

¹²Hermano, cúní rí jeē na cúcáhnú ni rō jíjnáhan ró ndese ni sáha jnúndóho ni ndoho ri. Chi ni sáha jeē ni jítē núu ga jnúhun jeē jnáma ya yohó. ¹³Chi tācá soldado cáyucú íni palacio, jíin tāca gá ñáyuu, cájini i jeē íne ri vecāa jeē siquí Cristo. ¹⁴Te siquí jeē íne ri vecāa, jeē yúcuan cúu jeē vihyá gā nihín ndeyí ni cuehē tācá hermano cácadíje nuū Jítóho yō. Te cáhiyo téyí gá ni de nácani de jnúhun ya, te tu ndé ndínúu ni de.

¹⁵Te ndaā chi sava tēe cānacani de jnūhun Cristo siquī jeē cuesún ni de jíin jeē nduxí de. Te sava ga de chi sa suhva cānacani de jnūhun ya siquī jeē váha ni de. ¹⁶Sava de cānacani jnūhun Cristo siquī jeē nducú de jeē váha máa-ni de, te tú ndije de, chi cācuni de jeē nihīn gā rī jnūndóho jeē íne ri vecāa. ¹⁷Te sava ga de chi cānacani de jnūhun siquī jeē cundáhú ni de ruhū, chi cājini de jeē íne ri vecāa siquī jeē cahán rī jehē jnūhun jeē jnáma ya yohó. ¹⁸Tú na vé sáha núu súcuan, chi tēcá-ni modo cascuíté núu de jnūhun Cristo, vēsú núu ndije de chí tuú. Te yāha cúu jeē cúsiī ni rī sáha.

Te suni cusīī gā ni rī, ¹⁹chi jíin rī jeē tāca jéē yáha sáha jeē váha ga coo jíin rí, chi cājicān tahū rō jehē rī, te Espírītu Jesucristo chíndéé ñáhán yá ruhū. ²⁰Chi ñūhun ni rī te cúu ndasí ni rī jeē ma sáha ri ni ñin jeē sáha jeē cucanu ri nuū yā. Chi sa suhva coo téyí ni rī cahān rī jnūhun ya, návāha ndujéhnū ga Cristo sáha máa rí vijna, nájñūhun je ni sáha ri ní véji ri, te vēsú na cótecu rī chí vēsú na cúu rī. ²¹Chi jeē técu rī cúu jeē nduú rí jíin Cristo, te jeē cúu rī cúu jeē vihyá gā váha coo jíin rí. ²²Te núu cotecu gā rī, te cuu scáca ga rī jniñū máa Jítoho yō. Núu súcuan te tu cúcáhnū ni rī ndé ñin cúu jeē váha ga, núu jeē cótecu rī chí jéē cúu rī. ²³Chi mēhñū ndíndúú jnūhun yáha íne nihīn ri. Chi ñin cúu jeē cuní rī quihīn rī condee rī jíin Cristo, chi yūcuan cúu jeē vihyá gā váha coo jíin rí. ²⁴Te suni cānuú gá jeē cótecu gā rī jeē siquī rohó jíjnáhan rō. ²⁵Núu súcuan te íyó ndáa ni rī

jeē quéndōo ri condee gā rī jíin rō, návāha stéén gā rī nuū rō ndese caca váha ga rō jíin yá, te cusīī gā ni rō jíin jnūhun cācandíje rō.

²⁶Núu súcuan te condee tucu ri jíin rō, te cusīī teyí ni rō jeē siquī ruhū, sáha máa Cristo Jesús.

²⁷Te máa ñin-ni jeē condíhvī ni rō caca ndaā rō, nájñūhun cānuú caca rō síquī jeē cācandíje rō jnūhun Cristo. Yūcuán na te vēsú na jíin rī coto jnáhan yó, chí condee jíca rí, te nihīn rī jnūhun ro jéē cáhiin nihīn rō jíin jnūhun ya, te cáhiyo ñnuú ni rō, te ñnuú-ni cānducú ndéyí rō siquī jnūhun jeē cācandíje yó jéē jnáma ya yohó. ²⁸Te ma yūhú cuítī rō sáha jeē cājito uhū rohó. Chi jeē jíto uhū i rōhó, yūcuan stéén jeē jnahnú ndetū i, te suni stéén jeē cācu ánuá maá rō jíjnáhan rō sáha Yāa Dios. ²⁹Chi ni jēhe Cristo uū jeē váha nuū rō: nasūu máa ñin-ni jeē candíje rō yá, chi suni jeē na ndóho rō jéē siquī yā. ³⁰Chi máa rí jíin rōhó jíjnáhan rō, nájñūhun jeē cājejnáhan yó jíin táca jéē neé. Chi ni cajito rō jéē súcuan ni sáha máa rí, te cānihīn rō jnūhun jeē sáha ga rī nde vijna.

Jeē ni sáha suchí yá maá yá te ni ndujéhnū ya

2 Núu súcuan te sáha Cristo jeē cáhiyo ndeyí ni rō, jíin jéē cúsiī ni rō siquī jeē váha ni yā jíin rō. Te ndéé Espírītu yā jíin rō, te manī rō jíin jnáhan rō, te cājito ndáhú rō i. ²Núu súcuan te na cócu ga rō jíin táca jnūhun yáha, návāha cusīī teyí ni rī. Te ñnuú-ni na cóo ni rō, te coyūcu mánī rō, te ñnuú na cóo ánuá rō, te ñnuú canī ni rō. ³Te

ni iin jniñu ma sáha ró jéē nducú ró jeē váha máá-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró. ⁴Te ma cóndihvī ni rō maá-ni jniñu jeē quéndōo vāha máá-ni ró, chi suni na cóndihvī ni rō jniñu jeē quéndōo vāha jnáhan ró.

⁵Te na cáni ni rō jijnáhan ró nájnūhun ni jeni ni Cristo Jesús. ⁶Chi máá yá cujéhnu inuú yá jíin Yaā Dios, te vēsú súcuan te tu ní jéni ni yā jeē cujéhnu inuú yá jíin Yaā Dios. ⁷Chi ni siaá yā jeē cujéhnu ya, te ni nduu ya nájnūhun índāa mozo, te ni cacu ya ni nduu ya tēe. ⁸Te ná ni nduu inuú yá jíin tēe, te ni sáha suchí yá maá yá. Te ni jendije ya nde jíin jnúhun jeē cúū yā, te nde jíin jnúhun canu jeē cúū yā jicā cruz. ⁹Jeē yúcuan ní sáha Yaā Dios jeē yóhoyo ni ndujéhnu luu ya, te síhví yá cujéhnu ndasí gá nuū tāca gá síhví. ¹⁰Te tāca jéē cáhiin andíví jíin ñáyiví jíin chíji ñáyiví, núu na cúni i síhví Jesús te jecuiñí yití i. ¹¹Te cahān ndaā ndivii i jeē Jesucristo cúu máá Jítóho. Te súcuan stéén i jeē yóhoyo cújéhnu máá Tátá yā Yaā Dios.

**Ñayuu cávandije cúu i
nájñūhun quīmi jeē ndíndēē**

¹²Núu súcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jíin ró, suni súcuan víhyá gā cuandije ró vijna jeē ndeé jícá rí jíin ró. Te condihvī ni rō jeē caca ndaā rō jíin jnúhun ní jnama ya rohó, te caca yíñúhún ró conso iyo ró núū yā. ¹³Chi Yaā Dios jícú ya jíin ró

jeē cúu ni rō sáha ró jniñu váha, te chíndēē ñáhán yá rohó jéē squícu ró jniñu núnahan ni yā.

¹⁴Ndihí jeē sáha ró, ma cahān sōo ró, ni ma tejnáhan ró, ¹⁵návāha cuu ró séhe Yaā Dios jeē tú na cuēchi coo siquī rō te coo ndaā rō. Te caca ndoo ró méhñu ñáyuu níhni ni jeē casáha néé. Chi méhñu ñáyuu un stéén rō jniñu váha ró, te súcuan cácuu ró nájnūhun quīmi jeē ndíndēē núū néé ñáyiví. ¹⁶Te stéén rō jñūhun ya nuū i jeē cótecu i ñíí cáni sáha. Te súcuan te cusíi teyí ni rī quiví ndíji Cristo, chi cuni rī jeē tu ní jícá cāhá rí, ni tu ní sájniñu cāhá rí. ¹⁷Te vēsú na cúū rī jeē socō rī maá rí nuū yā jeē siquí rohó, te yúcuan cúu jeē nducú rí scandíje ga rī rohó, návāha socō rō maá ró sáha ró jniñu váha jeē cávandije ró yá. Jeē yúcuan cúsiñi ni rī, te cúni rī jeē suni cusíi ni rō jíin rí jijnáhan ró. ¹⁸Núu súcuan te na cúsiñi ni maá ró jíin rí, te inuú na cúsiñi ni yō jijnáhan yó.

Jñūhun Timoteo jíin Epafrdito

¹⁹Te ñūhun ni rī jeē cuáha máá Jítóho yō Jesús jñūhun jeē tají yáchi rī Timoteo jeē de nuū rō, návāha ndusiñi ni rī núu na níhín rī jñūhun ndese cáhiyo ró. ²⁰Chi tuá na inga tēe íyó yáha jéē inuú jéni ni jíin rí, nájnūhun máá de jeē ndihví ndije ni de jehē rō. ²¹Chi tāca de cánducú de jeē cúu máá de, te nasūu jéē cuní Cristo Jesús. ²²Te je cájini rō jeē tēe vāha cúu Timoteo. Chi nájnūhun sēhe jíin tátá, súcuan ni jejniñu de jeē nácani de jñūhun vāha ya jíin rí. ²³Núu súcuan te ñūhun ni rī tají rí de jeē de nuū rō,

te núu je ni cucáhnu ni rī ndese coo jíin rí. ²⁴Te jéni ndije ni rī jeē cuāha Jítoho yō jnūhun jeē suni máá rí jinū yachī rī nuū rō jijnáhan rō.

²⁵Te suni jéni ni rī jeē cánuú tají rí hermano yō Epafrodito jeē de, chi tēe sájniñu jíin rí siquī jnūhun ya cúu de te chindéé ñájnáhan de jíin rí. Chi máá rō ni catajī rō de jeē cuajniñu de nuū rī tāca jeē cúmanī nuū rí. ²⁶Chi yōhyo cúu ni de ndacoto tucu de nuū rō jijnáhan rō. Te ni cucuíhyá ndasí ni de, chi ni canihīn rō jnūhun jeē ní cocuhū de. ²⁷Chi jendaá ni cocuhū de, te je yajni cuu de núú. Te Yaā Dios ni cundáhú ni yā de, te nasūu máñúhún-ni de, chi suni ruhū, návāha tú caa ga cucuíhyá ni rī jehē de núú. ²⁸Jeē yúcuan cúu jeē ndihví gā ni rī tají rí de nuū rō, návāha ndusiī ni rō jeē ndácoto tucu rō núú de. Te suni ruhū ma cucuíhyá ndasí gá ni rī. ²⁹Núu súcuan te na cúsiī ni rō jeē nájinū de nuū rō, chi cúu de hermano yō jeē candíje de maá Jítoho yō. Te coo yíñúhún rō jíin tāca tēe índāa nájñūhun cáa de. ³⁰Chi jeē siquí jniñu Cristo cúu jeē jé yajni cuu de núú. Chi ni chundeyí ni de jeē cúu de siquí jeē chindéé ñáhán de ruhū jíin jniñu jeē tu ní íyo modo sáha máá rō jijnáhan rō.

Jnūhun jeē cáca ndaā vāha yó

3 Te vijna, hermano jijnáhan rō, na cúsiī ni rō jíin máá Jítoho yō. Ruhū chi tu jnániní ni rī jeē tēe tucu ri jnūhun yáha núu rō, chi cuajniñu jeē quéndōo vāha ga rō. ²Condito rō máá rō nuū tēe casáha jniñu néé, jeē cándāa ná cándāa ina.

Chi cánducú de stújí de rōhó jēe casáha de circuncidar, te tu casáha de jniñu ndaā. ³Te máá yó cácuu ñayuu ni cuu circuncidar ndije, chi cáchiñúhún yó nuū Yaā Dios nde jíin ini jíin ánuá yō, te cácusī ni yō jeē yihí yó ndaha Cristo Jesús, te tu tēnuū yō jeē quéndōo ndaā yō jíin jniñu jeē sáha máá-ni yó. ⁴Núu jeē súcuan cúu te ruhū chi suni cuu tenuū ri jniñu jeē sáha máá-ni ri nuū. Chi núu ndé tēe jéni ni de jeē cuu tenuū de máá de, te ruhū chi víhyá gā cuu tenuū rī maá rí. ⁵Chi ni casáha circuncidar ruhū nuū uná quiví ná ni cacu ri. Te yucūn Israel cúu ri, te suni jnáhan yucūn Benjamín, te iin hebreo sēhe hebreo cúu ri. Te suni ni cuu ri tēe grupo fariseo jeē ni squícu ri tāca ley jnáhan ñuu rī hebreo. ⁶Te ni jito xeēn rī ñayuu cá candíje, chi yōhyo ni condihví ni rī jeē ma sáma i modo ley jenahán. Te ni iin tu ní cúu cahán jeē tu squícu ri ley un, chi ni squícu vāha ri. ⁷Te tāca jēe tenuū rī ún, chi sáha ri cuenta jeē tu ndé níhín jniñu cuiti, chi vijna te ni candíje ri Cristo. ⁸Te suni chíhi ri cuenta jeē vāha ga na náa ndihí jeē ní tenuū rī ún, chi vāha ndasí gá cúu jeē ni quíví ri ndaha máá Jítoho rī Cristo Jesús. Te jeē siquí maá yá te ni siaá rī ndihí ún, te sáha ri cuenta jeē nájñūhun yācá-ni cúu. Chi ni quíví ri ndaha Cristo, ⁹te ndúú yá jíin rí. Te tuá nducú rí quéndōo ndaā rī jeē jíin ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squéndōo ndaā yā ñayuu cá candíje. ¹⁰Te vijna te cúní rí jecūhun vāha ni rī ndese

Yaā cúu ya. Te cúní rí jeē poder jeē ní natecu yā cone jíin rí. Te cúní rí ndoho rí jíin yá, te nde jinū rí ndoho rí nájnūhun ni ndoho máá yá jeē ni jíhi yā. ¹¹Chi yōhyo ñūhun ni rí natecu rí nájnūhun ni natecu yā.

**Jeē nducú ndéyí Pablo
sínu de carrera de**

¹²Te ná tu nihīn rí ndīhi jeē ni cáhān rí ún, ni ná tu ije rí jíin. Te nducú ndéyí rí siquī ún, chi ñūhun ni rí jeē nihīn rí tācá un, chi jeē yúcuan cúu jeē ni nihīn Cristo Jesús ruhū xīhna gā. ¹³Hermano jijnáhan ró, tu sáha rí cuenta jeē jé ni nihīn rí ndīhi ún. Te íyó ñin jeē sáha rí, cúu jeē squéndōo rí tāca jéé ní cuu ichi yátá, te nducú ndéyí rí nihīn rí tāca jéé iyó ichi núu. ¹⁴Chi cúu un nájnūhun jeē jínu rí ñin carrera cuahān rí nde jinū rí andíví, te nihīn rí premio jeē cuáha Yaā Dios. Chi ni cana ya yohó jéé quihín yō nuū yā andíví siquī jeē yíhi yó ndaha Cristo Jesús.

¹⁵Te tāca yó jeē jé ni ije vāha yó jíin jnūhun cándíje yó, súcuan na cáni ni yō. Te núu ndé ñin ró sīin jéni ni rō, te Yaā Dios suni stéén yā nuū rō jeē násūu súcuan cúu. ¹⁶Te jíni ñūhún cani ni yō te caca yó modo jeē quijnáhan jíin jéé jé ni nihīn yō.

¹⁷Hermano, na ndácu ró rúhū jijnáhan ró. Te condēhe vāha ró ndese cájica ñayuu ndaā, chi cájica i nájnūhun ni castéén rí nuū rō. ¹⁸Te je ni cuu tijni jínu ni cahān rí jíin ró, te nde ndahyú rí cahān tucu rí vijna, jeē iyó cuéhē ñayuu cájica i ñin modo jeē steén jeē jíto uhū i jnūhun jeē ni jíhi Cristo jicā

cruz. ¹⁹Te ñin quiví te jnahnū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyí i máá i jíin jniñu néé jeē jéhe jnūhun canu. Te máni máá jéé iyó ini ñayívi cúu jeē ndíhví ni i. ²⁰Te máá yó chi ñayuu coyūcú andíví cúu yó, te cándetu yó jéé nde yūcuán ndiji Jitoho yō Jesucristo, Yaā jnáma yóhó. ²¹Te máá yá nasama ya yiqui cúñu ndahú yó, návāha nduu yó nájnūhun cáa máá yá jeē lúu cújéhnu ya. Te súcuan sáha ya jíin poder yā jeē cújéhnu ya siquī ndīhi-ni.

Níní na cúsiñ ni yō jíin Jítoho yō

4 Núu súcuan hermano jijnáhan ró, cuiñi nihīn ró jíin jnūhun máá Jítoho yō. Chi yōhyo maní rí jíin ró, te cúní rí jeē coto jnáhan yó, te cúsiñ ni rí jíin ró, te nájnūhun premio rí cácuu ró.

²Te cáhān ndahú rí jíin róhó Evodia jíin Síntique jeē ñnuú na cóo ni rō, chi cácuu ró hermana jeē cácandíje ró máá Jítoho yō. ³Te suni cáhān ndahú rí jíin róhó, téé jeé ní chindéé ñájnáhan vāha jíin rí, jeé na chindéé ñáhān ró hermana un, chi ni casájniñu nihīn ña jíin rí siquī jnūhun jeé jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō síhví i nuū libro jeé yosó síhví ñayuu cotecu níí cáni.

⁴Te níní na cúsiñ ni rō jijnáhan ró jíin máá Jítoho yō. Te ñnga jínu cáhān rí jeé na cúsiñ ni rō. ⁵Sáha vāha ró jíin táca ñayuu, návāha cuni i jeé súcuan vāha ni rō. Chi máá Jítoho yō, yajni-ni cúu ya jíin ró.

⁶Ma nácani ndasí ni rō siquī ni iin. Chi sa cahān rō jíin Yaā Dios siquī tāca jéē nácani ni rō. Chi cacān tahú rō, te cahān ndahú rō, te suni nacuatáhú rō nuū yā. ⁷Yūcuán na te sāha Yaā Dios jeē cóo ndeyí coo siī ndasí ni rō, te súcuan coo jíin rō nde cūhva jeē ma jécūhun ni rō ndese cúu jeē sāha ya ún. Te condito vāha ya anuá rō jíin jéē níjnūnī rō, coo cuehē jnūhun ndeyí jnūhun siī ni jíin rō, siquī jeē yíhi rō ndaha Cristo Jesús.

Jeē na cáni ni yō siquī tāca jéē vāha

⁸Te iin na jnūhun íyó, hermano jijnáhan rō. Na cáni ni rō siquī tāca jéē iyó ndāā, jíin jéē sāha yíñúhún, jíin tāca jniñu sāha vāha, jíin jniñu íyó ndoo, jíin tāca jéē iyó mánī ni, jíin jéē lúu sāha. Te mánī na núcūhun ni rō tāca jéē vāha jeē sāha jeē nácuatáhú rō nuū yā.

⁹Tāca jéē ni stéén rī nuū rō, jeē ní cacutūhva rō núu rī, jíin jéē ní cajini rō ní cahān rī, jíin jéē ní cajito rō ni sāha ri, tāca yúcuán suni na sāha máá rō. Yūcuán na te máá Yaā jeē jéhe jnūhun ndeyí siī ni, coo ya jíin rō.

Jeē ní casocō ñayuu Filipos nuū Pablo

¹⁰Te yōhyo cúsiī ni rī sāha máá Jítóho yō, chi vijna te ni canucūhun tucu ni rō jeē chindéé ñáhán rō rúhū. Te nasūu jéē ní naa ni rō sāha rō súcuan, chi siquī jeē tu ní íyo modo. ¹¹Te nasūu jéē cahán rī siquī jeē ndóho ndáhú rí, chi je ni cutūhva ri cusīī ni rī jíin jéē névāha rī. ¹²Jínī rī cotecu ndahú rí, te jínī rī cotecu cucá rí. Chi ni cāan

ri jíin táca-ni, núu jeē ndutú chíji ri chí jéē ndóho ri sōco, núu jeē cónevāha cuehē rī chí jéē cúmani nuū rī. ¹³Ndihī-ni cúu sāha ri, chi máá Cristo jéhe ya fuerza ini rī. ¹⁴Te vēsú súcuan te vāha ni casáha rō jéē ní chindéé ñáhán rō ruhū jíin jnūndóho jeē ndóho ri.

¹⁵Te rōhó ñáyuu ñuu Filipos, je cájini rō ndese ni cuu. Chi nde quivī ní quejéé rí nácani ri jnūhun jeē jnáma ya yohó, ná ni quenda ri Macedonia vēji ri, te ni casocō rō xūhun núu rī siquī jeē ní canihīn rō jnūhun ya ni nacani ri. Te ni iin grupo ñayuu cácanđje tu ní sāha súcuan, chi máá-ni rōhó jijnáhan rō. ¹⁶Te ná íne ri ñuu Tesalónica, te ni catají rō jecu jeē jíni ñúhún rí, ni jinū iin uū jínu. ¹⁷Te nasūu jéē nducú rí jeē cuáha rō núu rī, chi sa nducú rí jeē na cáyá gā jniñu vāha rō, návāha cayā tahū rō nuū Yaā Dios. ¹⁸Chi je ni nihīn rī ndihī jeē jíni ñúhún rí, te ndóo ga. Te íyó cuehē nuū rī, chi ni nihīn rī jeē ní catají rō vēji jíin Epafrodito. Te jeē ní catají rō cúu nájñūhun iin ofrenda jeē asín jeén, ni casocō rō nuū Yaā Dios, te cúsiī ni yā jíin. ¹⁹Te Yaā Dios chi cuāha ya nuū rō tāca jéē cúmani nuū rō, chi cúcá ndasí yá jíin tāca jéē vāha jeē lúu íyó núu Cristo Jesús. ²⁰Te na cáhán yō jeē yóhyo luu cújéhnu Tátá yō Yaā Dios ní cáni. Amén.

Saludo jeē sándīhí

²¹Cachi rō nuū tāca ñáyuu máá yá jeē sándeýí ni i, áchí rí, chi cácanđje i Jesucristo. Te hermano yō cáyūcu jíin rí yáha, cácahān de jeē sándeýí ni rō jijnáhan rō. ²²Te tāca ñáyuu máá yá jeē

cáhiyo yáha, suni cácahān i jeē sándeýí
ni rō. Te ñayuu cáyūcú vehe rey cújéhnū
ñuu Roma yáha, máá i cácahān gā
súcuan.

²³Te ñúhun ni rī jeē maá Jítóho
yō Jesucristo, na sáha ga yā jeē
váha róhó jíjnáhan ró. Súcuan na
cóo. Amén.